

Pelajar-pelajar Agama Memperkemas Dirinya

Baru-baru ini pelajar-pelajar agama di utara Malaya telah bangun mengemaskan dirinya dan hasilnya terdirilah “Kesatuan Penuntut-penuntut Agama Kedah” (KAPAK) dan terbitlah majalah “Cetusan Islam”, “yang menyuarakan segala hasrat keseluruhan pelajar-pelajar Islam angkatan baru ke tengah-tengah masyarakat”. Majalah ini dipimpin

Jamaluddin Amini dan ketua pengarangnya ialah Johari Ahmad.

Di bawah ini kita sajikan tulisan Ibrahim bin Puteh menjelaskan sebab-sebabnya maka kesatuan “pelajar-pelajar agama” ini ditubuhkan – P.Q.

(oleh Ibrahim bin Puteh)

Kita tak reda lagi menyaksikan godaan nafsu syaitan yang ditiup oleh bangsa-bangsa Barat merebak bermaharajalela di persada tanah air kita ini. Kita tak reda menyaksikan golongan-golongan yang memperolok-olokkan agama Islam sebagai satu agama yang rendah dan lapuk pada hal ia adalah satu agama yang tertinggi sekali berfaham luas – memimpin manusia ke jalan Allah. Kita tak reda melihat bangsa kita ditekan dan ditindih dengan serba ragam oleh oleh orang yang tidak berperi kemanusiaan. Kita tak reda ... itu semua. Tetapi kita mahu agama Islam kembali bangun sebagai satu agama yang benar-benar memimpin manusia ke jalan Allah membawa sempurna bahagia. Kita mahu bangsa kita sedar semula dari segala kelalaian ke arah kemajuan mengikut dasar al-Quran al-Karim dan kita mahu budi Malaya timbul dalam tiap-tiap sanubari bangsa warganegara kita supaya kehidupan bangsa kita dapat terpimpin kembali menuju ketuhanan yang hakiki. Kerana itulah kelahiran “KAPAK”.

Dari sehari ke sehari beberapa banyak persuratan-persuratan lahir di negeri ini sebagai cendawan. Persatuan itu persatuan ini – gabungan itu gabungan ini tetapi sayang boleh dikatakan satu pun tak ada yang benar-benar bertugas

membela pelajar-pelajar agama – kalaupun ada di dalam manifesto mereka hanyalah terletak di manifesto sahaja – untuk menyedapkan pendengaran rakyat supaya terpengaruh dengan pertubuhan mereka. Tetapi dalam kebatinan mereka tidak sedemikian. Sebab kononnya penuntut-penuntut agama tak boleh maju – tak boleh bergerak mengikut peredaran zaman dan berbagai-bagai lagi kata nista yang menjatuhkan nama pelajar-pelajar agama – oleh itu mereka dibiar...tidak dipedulikan...tidak setimpal sekali bantuan yang diberi oleh kerajaan – amat berbeza kalau dibandingkan dengan penuntut-penuntut di sekolah Inggeris – sekolah-sekolah besar, hostelnya panjang-panjang dan cantik, taman bunganya indah, padang permainannya terbentang luas – sukanan pelajaran sentiasa diambil berat, dan diberi nilaiann besar meninggal tempat pengajiannya. Tetapi penuntut-penuntut agama? ...nun jauh dari itu semua.

Beberapa abad berselang sesudah hari berganti hari, bulan berganti bulan. Tahun berganti tahun dan seterusnya...penuntut agama tinggal di dalam serba kejatuhan masyarakat memandang rendah, keadaan sedemikian merosot – tak ada nilaiann dan penghargaan.

Sebab tidak ada persatuan yang mahu membela, itulah maka harapan untuk naik ke tingkat atas tak ada langsung malah

bertambah rendah – tambahan pula penuntut-penuntut agama sendiri menimbulkan angkara yang sesungguhnya boleh menjatuhkan kedudukan mereka – buktinya selalu terdapat perselisihan tak berhenti-henti antara pelajar-pelajar sekolah tinggi dengan sekolah pondok – memburuk-buruk antara satu sama lain – keji mengeji dan berbagai-bagai lagi.

Tetapi sekarang harapan kembali tinggi – segala anasir yang merobohkan itu mungkin hilang lenyap apakah sudah berdiri sebuah kesatuan yang benar-benar dipercayai dapat berusaha menghapuskan segala yang merobohkan itu. Kepada Tuhan kita berharap supaya dengan perantaraan “KAPAK” yang dihului oleh pelajar yang sedar. Hendaknya segala perselisihan secepat kilat dapat disingkirkan – dibuang jauh, dan akan mengambil tindakan yang tepat terhadap pihak yang berkenaan supaya bantuan dan segala sesuatu yang bersangkut dengan sekolah agama dapat diselenggarakan dengan secukup-cukupnya sebagaimana yang diberi kepada sekolah-sekolah Inggeris sehingga penuntut-penuntut agama sejarah dengan lain-lain penuntut, tatkala itu baharulah dapat dipersaksikan bahawa

penuntut-penuntut agama adalah satu benih yang hidup berjiwa seperti yang lain-lain juga, dan memiliki daya yang teguh dan perdirian yang tegap didalam segala lapangan – biarpun dalam perekonomian, politik, dan apa sahaja.

Meskipun begitu besar kita meletak harapan terhadap “KAPAK” dengan terang-terang kita berani mengatakan bahawa semuanya itu tak akan dapat dijayakan kalau hanya setiausaha dan yang di-Pertua sahaja bertungkus-lumus sedang lain-lainnya tak mahu bekerja (terutama penuntut agama sendiri), akan tetapi bantuan yang banyak dari seluruh golongan dikehendaki dalam tiap-tiap hal. Apabila ada kerjasama bantu-membantu baharulah cita-cita kita yang suci murni itu akan tercipta. Seandainya sifat berganding bahu dan bekerja, tumbuh dalam tiap-tiap sanubari kita maka dalam masa yang singkat sahaja berkuasalah kita mengubahkan sikap lama yang serba usang itu kepada pembangunan iaitu meninggi dan menyusun sistem pelajaran yang tertentu, mendidik tunas-tunas harapan bangsa dan bunga negara ke arah mengenal agama Islam secara luas maju mengikut perubahan zaman.

Belajarlah dengan Pos

pelajaran agama	sebulan	\$3.00
pelajaran Arab	sebulan	\$3.00
pelajaran Inggeris	sebulan	\$3.00

pelajaran dengan pos tiap-tiap minggu
penuntut-penuntut baru diterima
kirim wang terus kepada:-

tak payah kalau pergi sekolah
tuan boleh belajar di rumah sahaja

**YAHYA ARIFF 37 JALAN KANGSAR
KUALA KANGSAR**